

焦氏四書講錄

焦氏四書講錄孟上卷之九

公孫丑問曰夫子當路一節

夫子當路於齊是公孫丑之設言管晏

之功可復詩且尚恐

孟子曰子誠齊人也知管仲晏子而已矣

管仲晏子是齊人公孫丑亦齊人故孟子斥之曰子誠齊人也但知有管仲晏子而已自管晏之外更有抱聖賢格心之學達帝王莫大之功者則未之知矣

或問平曾西曰一節

此條引曾西之答問垂在管仲一邊然不去子路一段者正見管仲不如子路也管仲且不如子路况能如孟子乎○吾子與子路孰賢與管仲孰賢都以人品說不說事功或人初

比魯西於子路曰其不敢當繞以管仲比之亦知管仲不如  
子路者較之公孫丑更優○聖賢之功間有不大就者以其  
得君不專或得君專而又在位不久也管仲得君專既有可  
爲之勢行政久又有可爲之時而功烈却如彼卑是以不足  
取耳○問管仲之功聳大於孔子魯西何以卑之曰孔子是  
就管仲的功論魯西是把聖賢事律他卑之者小其詭之意  
大之者惡而知其美之意若有問孔子曰夫子與管仲孰賢  
則孔子亦斷不曰微管仲吾其被髮左衽矣

曰管仲魯西之所不爲也而子爲我願之乎

魯西學於孔氏我與魯西同一學術管仲既魯西所不爲亦  
我所不爲也而子願我爲之乎不要說低了魯西管仲不  
爲則晏子可知矣

曰管仲以其君霸一節

凡事能左右之曰以以其君霸以其君顯

是管仲以其君自能如此

曰以齊王由反手也

此以字即上二以字我若以齊之君先不止於霸不止於顯而可以王王亦不勞餘力特反手之間也管仲晏子真不足爲矣○問當時周室尚存孟子要以齊王不知置周於何地恐非春秋尊周之意曰此時列國兵爭天下糜爛已極天命人心已去周了周天子作主不得雖孔孟亦不能輔之有爲正合革命之時也夫語其時既當革矣齊之勢又易革矣孟子之才又能革矣若當路於齊又可革矣易之革曰改命吉此之謂矣故春秋尊周者文王之以服事殷也舍周王齊者

武王之順天應人也道其並行不悖者哉

曰若是則弟子之惑一節

文王不足法公孫丑云文王之德是德之盛者猶難於王今夫子以齊王爲反手不待百年而已治不待人繼而自行豈夫子之德優於文王而文王之德不足法歟

曰文王何可當也一節

文王何可當此句提起看文王之德本不可當而易於王其不王者時勢難之也由湯至久而後失之一段是時之難尺地至是以難一段是勢之難○由湯至武丁賢聖之君六七作思之結民心者深教之成民俗者厚故天下歸商已久一時難變而歸他也○盤庚後商道寔衰諸侯多不來朝武丁用

賢脩政赫然中興故云朝諸侯有天下猶運之掌○由湯至武丁已連武丁說了而再說武丁之盛者不重在武丁只爲紂去武丁未父云耳○故家者舊臣之家遺俗者舊民之俗屬下邊說流風者風化之源善政者政事之善屬上邊說俱是武丁時的雖不能盡存猶有存者微子微仲比干箕子四人是同姓之賢膠鬲一人是異姓之賢○時之難有兩小段湯至武丁與武丁至紂是失勢之難亦有兩小段地與民是矣○看來孟子此處亦未及論文王之心也文王之心即時勢足以代商亦不忍於王者易之既濟曰東鄰殺牛不如西鄰之禴祭實受其福紂雖殺牛時已過矣文王雖禴祭時則方來也是果時勢之難王乎宜王而不王此文王之心也此

孔子所以謂之至德也哉

齊人有言曰雖有智慧一節

此承上起下之語智慧鉉基不兩平下句是明上句雖有智慧不如乘勢雖有鉉基不如待時今齊之時則有其勢而不可乘也有其時而不必待也其王天下不可以文王例矣

夏后殷周之盛一節

此條說齊王勢易不似文王之勢地不改闢異於天地莫非商有民不改聚異於一民莫非商臣○夏后殷周之盛王畿不過千里而齊有千里之地是地已闢了不待改圖而後闢民居必有雞犬自國都達四境居之密而雞犬相聞是民已聚了不待改圖而後聚有地則有財也地闢則財富有民則

有兵也民聚則兵強我若乘此勢而以齊王行仁政則其三  
真猶反手矣而就能禦之耶

且王者之不作一節

此條說齊之歸易不似文王之時主者不作異於商之賢聖  
繼作虐政憔悴民於紂之猶有善政○時是機會勢是力量  
既有了勢又有了時我若乘此時而以齊王行仁政則不待  
深仁厚澤而民心爲易感猶饑者之於食渴者之於飲不待  
甘美之味而感之亦易深也饑渴二句即賈生云饑者其糟  
糠寒者利短褐天下啓一新王之資也或以饑食渴飲作仁  
政的實事豈憔悴之民皆是饑渴而欲王天下者須一一  
孔子曰德之流行遠於邇邇而傳命



此引孔子之說只以證行仁政而王與饑渴易爲飲食之意不可把此條與時勢二條作三平看謂時勢既易而德行又速也速於字訓作過字置郵之傳命固速而德尤過於置郵速之甚矣○德行速本時勢易證孔子未必有此意引之者然也若不本時勢說則文王之百年未洽者又何不速與當今之時一節

此總上文之語當今之時易也萬乘之國勢易也我若乘此時勢而以齊王行仁政民之悅之猶解倒懸其德行亦甚速也故政事之行但半於文王不必百年之久不待武周之繼而功烈之所就則必倍於文王不止三分之有二天下之未洽矣所謂王猶反手者此也夫以文王之功而且可許其

倍之況管仲晏子區區霸顯之功又何足爲哉○問晏子不消說若孟子處管仲之時不知他功業如何做曰聖賢作用的妙處固不可測然大要亦只是尊夏攘夷一匡天下耳但孟子是實心實意去做不比管仲之假仁義以濟私欲也故曰王霸之分只在誠偽而已矣君子可不審其幾哉

公孫丑問曰夫子加齊一節

夫子加齊之卿相是公孫丑之設言霸王不異只說任大責重而可以致王霸不說就能霸王了丑還恐孟子擔當霸王不過而有疑懼之意在○孟子說我四十不動心此時想在四十後更有何動心處以齊王猶反手又何霸之足問曰若是則夫子過孟賁一節

公孫丑見孟子勇於擔當遂借孟賁以贊其不動心之難告  
子先我不動心孟子此處亦未論告子之是非只借以見不  
動心之不難告子且不動心而且又先於我信乎不動心之易也  
曰不動心有道乎曰有

丑是泛問不動心之道孟子亦是泛說不動心有道心只要  
有主人若各任其意見各守其學術而執以為此心一定之  
主則隨其身之所接而此心亦皆不動如下文所引以必勝  
為主者是北宮黝不動心之道以無懼為主者是孟施舍不  
動心之道以理為主者纔是曾子不動心之道○程子云心  
未定者不熱而煩不寒而慄無所惡而怒無所悅而喜無所  
恥而起君子莫大於正氣欲正其氣莫若正其志志既正則

雖熱不煩雖寒不慄無所怒無所喜無所取去就猶是死生  
猶是夫是之爲不動心○不動心便是勇故下文以勇字發  
北宮黝之養勇也一節

此條是北宮黝不動心之道不撓不處只是不至被刺意非  
謂刺之亦不撓不處也思以九句把思以一毫挫於人二句  
爲主下七句都本此二句說惟其不肯一毫挫於人故不但  
不受辱於禍寬博雖萬乘之君亦不受其辱而視刺萬乘之  
君若刺褐夫無所嚴憚者蓋雖諸侯有惡聲至猶必反之而  
况肯受其辱也要之此亦極言黝之勇耳其實果有萬乘之  
君在上因事挫他黝何敢刺之莫謂刺之雖惡聲亦不敢反  
之也如此則亦不能保其不動心矣

孟施舍之所養勇一節

此條是孟施舍不動心之道。視不勝猶勝六句都是舍之言。量敵者量別人不能勝我。慮勝者慮我能勝別人。二句亦是一意。此正臨事而懼行三軍之道也。舍却以爲畏三軍而無勇者。他只要無懼勝負都不計較國事幾於僨矣。

孟施舍似曾子一節

孟施舍似曾子。北宮黝似子夏。只以氣象之近似說。舍專守己。曾子反求諸己。此相似處。只以兩箇已字作眼。黝務敵人。子夏篤信聖人。此相似處。只以兩箇人字作眼。○二子之勇。未知其孰賢。直是說二子之勇一般。未有一箇賢者。然論其所守。則舍比之黝爲約。約者不是守這約。乃是所守者得。

其約也蓋在人者不可必在己者可常必務勝人者其心主於必勝而不動然人或以力勝之亦不免爲之動了專守已者其心主於無懼而不動戰勝不消動論不勝亦無懼而不動是之爲得其要矣○

昔者曾子謂子襄曰一節

此條是曾子不動心之道舍黜之所守要皆非守之正而其爲勇要皆非勇之大者曾子終是守之正而勇之大也孟子之勇蓋得之於曾子而曾子之勇又得之於孔子不動心之本源正在此乃所顯則學孔子也此處已見得矣○自反不縮一段輕只重自反而縱一段縮不縮指理說不惴吾往指氣說吾往不專是往戰兀往而決大疑往而斷大事皆是也理直則氣壯豈不直氣饒不直者雖褐寬博亦喘之而况

于貴者乎直者雖千萬人亦往而況其少者乎○孟子直養  
無害集義而告終正勿忘勿助長即自反而縮之謂也至大  
至剛塞乎天地之間即千萬人吾往之謂也宛然孔氏家法  
孟施舍之守氣又不如曾子之守約也

此是贊曾子所守之約舍之守特約於默若以之較曾子則  
又不如曾子之守約也蓋舍所守是氣曾子所守是理凡事  
以曲直爲老壯舍之無懼不能以理爲主全是氣之所爲若  
有人以理勝之未有不屈者如項羽蓋世拔山之氣只被高  
帝三軍縞素爲義帝發喪羽之氣便從此屈而奄奄九泉下  
人矣曾子以理爲主有理就有氣內省不疚者夫何憂何懼  
王公遇之失其貴晉楚遇之失其富儀秦遇之失其辯賁育

遇之失其勇隨他天來大事皆不能屈辱故曰又不如曾子  
之守約也要之舍不如曾亦因齒及此

止言輩之不知也

曰敢問夫子之不動心一節

此條是丑問孟子與告子不動心之道不得於言勿求於心  
不得於心勿求於氣是告子不動心之道知言養氣是孟子  
不動心之道雖有得失精粗之不同然皆是心有主而不動  
者也○不得於言如欲言性而不得性之理欲言事而不得  
事之理此是心上理不明之故合該審思明辨而求其理於  
心告子以爲如此心便動了故寧舍置其言隨他鶻突更不  
求其理於心不得於心如接人有所失而心不安應事有所  
失而心不安此或是氣上有暴戾之故合該謝愆補過而求



其助於氣告子以爲如此心便動了故無強制其心隨他失  
者更不求其助於氣不得於心勿求於氣亦是不可的而僅  
可之者以之較不得於言勿求於心則爲彼善於此耳要之  
僅可者畢竟不可故下文歷歷說氣之當養以見不可之意  
○此言字與知言言字不同此是自己的言知言是別人的  
言孟子於人言上知之則已之言可知矣告子於己之言且  
不得況人之言乎○夫志氣之帥六句不是以志氣平說重  
在氣一邊此爲破告子勿求於氣說也晦庵子於志上都着  
一箇字而帶落到氣邊去最好志爲氣之帥者管攝百體主  
宰群動若握權而出令者有將帥之義氣爲志之役者一進  
一退一往一來小者運之而大隱者張之而顯有充滿之義

至次二句就因上二句見得爲氣之帥便是至者爲體之充便是次者至者所當持故曰持其志次者亦不可恭故曰無暴其氣告子於氣而勿求則必不免暴氣之病而僅可者亦終歸於不可免○次是即次之意但此處且莫說得要緊意太明了且是以又有下文之疑○看來孟子之不動心只是心上用功養氣不過是其助也持其志無暴其氣語雖相兼而意實以志爲重持其志者志是心之所之於此而敬守之無一念不合理無一事不合理一切氣便自調停安得暴戾只一持志自然無暴氣了故持志是一了百當的工夫所以兼云無暴氣者只爲告子之勿求於氣說耳若告子無此病痛則無暴其氣亦不消說罷○陽明子曰告子之不動心只

在不动心上着工夫孟子之不动心便直從此心元不动處分曉。心之本體元是不動的。只爲事有不合義便動了。孟子不論心之動與不動只是集義事。無不是義此心自然無可動處。若告子只要此心不動便是把捉此心將他生生不息之根久阻撓了。此非徒無益而又害之者也。可與孟子較短長也。既曰志至焉一節

丑此問重在氣上孟子答之亦以氣爲重蓋次之爲說不是以氣爲不要緊也彼志一了固能動氣而氣一了亦能動志此持其志者所以又要無暴其氣志一動氣氣一動志都兼善惡說今夫二句明氣一之動志只就惡邊說者即其惡而善者可知惡亦不止於趨蹌只就粗處說者即其粗而精者

可知矣○親美色聽淫聲心便爲之荒亡聞善言見善行心便爲之豁達其踴躍體而怠惰之心自生手重足恭而敬慎之心愈篤此皆氣一動志之驗也不得於心勿求於氣者其殆遭一蹶而不得一便者乎

政問夫子惡乎長曰我知言我善養吾浩然之氣

此條是丑問孟子所以異於告子之強制者有何長處知言養氣正是孟子之長都就成功說知言則有以明乎道義而於天下之事無所礙此心自然不動而與告子之不得於言勿求於心強制而不動者異養氣則有以配乎道義而於天下之事無所礙此心自然不動而與告子之不得於心勿求於氣強制而不動者異○問不說窮理却說知言如何曰人

在堂上方辨得堂下入曲直能窮理統能知言不然何以辨得是非邪正說知言則窮理可知了且易簡而易知者理也人之語言千態萬狀却不可測最爲難知者能知言則窮理又不足道矣○養氣便不是失養之善便又不是助養然亦不在氣上用工夫只一集義而止義出於心是從心上下手也故知無恭其氣者六一時其志足失氣上可着工夫耶取問何謂浩然之氣曰難言也

浩然之氣難言不是真無可言者學者須工夫到頭方此氣充滿方識得此氣方可與他言稍不到頭的行不去子便說氣非浩然却不知是自家欠了工夫豈能浩然得縱與他言亦不信故難言二字認須實體而自得也○問浩然之氣與

血氣同否曰只是一箇氣有理在其中便爲浩然之氣不由理而發便只爲血氣耳然人所稟氣亦自不同有稟得強者遇事亦隨分作得去有稟得弱者全不能有所振作惟是養成浩然之氣便與天地一脈無箇強弱之別

其爲氣也至大二節

此兩條正言浩然之氣都就氣說尚未說到人能養成此氣故兩以其爲氣也起之到必有事焉處纔就人能養氣者說晦庵子於配義與道處即云人能養成此氣恐非本旨天地之氣最剛大人得天地之氣以生故亦如此剛大此是氣之本體然非直養則本體亦不可見故以直養者說直養是以義養之義之理最直直養便是無害非直養了又須無

害也此亦輕說過只以見氣之剛大耳若謂剛大塞天地者  
全由人爲得來却不是氣之本來面目矣○問氣在人身如  
何能塞天地曰天地間只有此氣無一事不可做無一處不  
可到所謂置之而塞乎天地溥之而橫乎四海洋溢乎中國施  
及乎蠻貊天之所覆地之所載莫不尊親者非塞天地而何  
也如禹手脤足胷而地平天成文武一怒而安天下之患孔  
子誦述六經而萬世爲憲天地之間不果充塞哉

天地之生合理氣合下一齊交付理合於氣氣合於理一滾  
出來自然相合而不相離若相配然者道義是理凡其運用  
張弛以至塞乎天地之間都是氣之所爲若無是氣便餒子  
雖有道義亦何以行之譬之魚水氣是水道義是魚水與魚

是相配合而有助者。魚得水纔能躍而行。若無水便困而死矣。道外無義。義外無道。此云義與道者。猶理也。義也之謂耳。晦庵子云。道者天理之自然。義者人心之裁制。人心天理一也可分爲兩物哉。

是集義所生者一節

此條亦是言浩然之氣。還就氣說。未說人之能養與不能也。氣之在人。是集義所生。非以義襲而取之者。蓋集義之人心。體正大光明。純是德性用事事。都快於心。仰不愧於天。俯不忤於人。自然揚眉吐氣。烈々轟々。而此氣充塞乎天地之間。故曰是集義所生者。重集義上生字。對養字看。亦不是本無而乍生起也。非義襲句。只反說以見不可不集義耳。義襲



者事事不合義只一事之義敢作敢爲恰似有氣魄的然無  
生生之理只是此客氣不久便消索如何取得氣來行有不  
慊二句是發明非義襲之意行有不慊於心者事；儘合義  
只有一事不義而不慊於心氣便餒了○况於事；不義只有一  
事不合義者可襲而取之乎○義便慊於心不義便不慊  
於心可見義在心內不在外也告子以義爲外則必不能集  
義而不慊於心矣浩然之氣何自而生哉

必有事焉而勿正一節

此條纔說人之養氣者要以集義爲事集義與義襲是一路  
的骨子有事便是集義正忘助便是義襲○有事勿正作一  
聯說勿忘勿助長作一聯說養氣者要氣之生必以集義爲

事而勿正其效。既以集義爲事宜，乎氣之充而或未充者，必是  
是集義之未至，但當勿忘所有事而亦勿助其長也。○問：忘  
是忘箇甚麼？助是助箇甚麼？陽明子曰：我此間講學，只說箇  
必有事焉，不說勿忘勿助。必有事焉者，只是時時去集義；若  
時時去用，必有事的工夫，而或有時間斷，便是忘了。○即須勿  
忘時時去用，必有事的工夫，而或有時欲速求效，便是助了。  
○即須勿助其工夫，全在必有事焉上用，勿忘勿助，只就其間  
提撕警覺而已。若是工夫原不間斷，即不須更說勿忘，原不  
欲速求效，即不須更說勿助。此其工夫何等明白簡易，何等  
灑脫自在。今却不去，必有事焉上用工夫，而乃懸空守着一  
箇勿忘勿助，正如煮飯鍋內不曾漬水下米，而專去添

柴放火不知畢竟出箇甚麼物來吾恐火候未及調停而鍋已先破裂矣○正忘助俱不可有者然助長之害尤甚有志向的人要去幹事業多懼助長之害故無若宋人以下專以助長說宋人事有無不可知然不云別國而云宋人者告子是宋人亦是譏告子也陽明子謂告子強制其心是助的病邪故專說助長之害是矣○天下之不助苗者寡猶今人文字之影語是說不助氣者寡也以爲無益二句輕只重助之長三句舍氣不養者氣尚爲未稿之苗助氣而長者氣則爲稿苗而無復有秋之利非徒無益而又以害之是無利而有害也說到利害之際令人踈然一悟○問助長害氣是甚何樣子曰如殷浩強學伊呂而有北伐之敗王介甫強學周

公而有熙豐之禍王仲淹強學孔子而有獻策之羞堅白不足而自試於磨涅未有不至於磷淄者助長之害是如此○集義而勿正忘助長是爲直養無害善養浩然之氣者去是爲自反而縮千萬人吾往者去其不動心也有由然哉何謂知言曰一節

此條是說知言之事人之言皆本於心心裏有失言纔有失孟子之知言是因其言之失而知其心之失也○言有善惡邪正都該知得此只云說淫邪遁者知得不好的一邊則好的一邊亦自見得蓋天下事只有箇是與不是辨得那不是的就識得那是的了然非窮理之至者亦安能辨得如此親切乎○說淫邪遁亦是從告子說來說者心蔽而言亦蔽淫

者心陷而言亦陷邪者心離而言亦離遁者心窮而言亦窮但在言謂之蔽淫邪遁在心謂之蔽陷離窮各以其類耳生於其心四句謂蔽陷離窮既生於心不止其言誠淫邪遁也以此而議政以此而議事必且害於其政大綱都被害下害於其事衆目亦都壞了政事之害不分先後胡氏云此處先政而後事後篇先事而後政只見得無大無小莫不有害不必拘先後者是矣○聖人後起必從吾言指生於其心四句此不是誇吾言之足以取信於聖人乃是決爲之辭見得生於其心者斷斷乎害於其政事矣○生之爲性者告子之言也而知其有人類爲犬牛之害爲我兼愛者楊墨之言也而知其有無父無君之害縱橫閭閻者蘇張之言也而知其有

率土地而食人肉之害不徒知之深而尤距之嚴孟子之知言亦大有功於天地之間者耶○知言便是天下之至明矣養氣便是天下之至誠矣明誠合一此孔氏家法也守之於曾思者又得之於孟子矣其不動心也有由然哉

率我子貢善爲說辭二節

率我子貢善說辭是有言者不必有德顏冉閔子善言德行是有德者必有言善言德行亦是兼言行而有之者但丑學識粗淺以爲只是德行而不善說辭○知言則必善說辭養氣則又有德行是亦孔子兼之也故曰既聖矣

學不厭是學聖人之道而不厭教不倦是以聖人之道教人而不倦○學不厭者常常存此虛靈不昧之心故曰智也教

不倦者常存此萬物一體之心故曰仁也仁智總不外一箇心一存心而聖人之事盡矣

昔者竊聞之二節

聖人之道渾然全體子張得其威儀游夏得其文學是爲一體顏冉問子且得全體但未能大而化之一體不要說小下微字亦只輕帶說五意都以爲好故問孟子之

所發者在何人

問顏子地位儘高亦姑舍是如何曰此是孟子之志立志者須以聖人自期待纔讓第一事與別人便是自棄古人立志大率如此但立志之後要力行以酬此志不然則其志膠膠而行不挽焉者亦何足取乎

曰伯夷伊尹何如一節

伯夷伊尹何如丑問孟子安之否孟子說與我不同道道既不同則亦在所不安也○仕止是出處久速是去就○皆古聖人提起孔子把夷尹帶落說孔子因是聖人而夷尹亦是聖人也吾未能行句輕只重願學孔子句舊說伯夷能清不能任伊尹能任不能清孔子則不偏於清而未嘗不清不偏於任而未嘗不任我所以願學之如此則夷尹孔子之優劣判然矣丑又何疑其若是班乎

伯夷伊尹於孔子一節

自生民以來不是說凡民中未有孔子自天地生人以來聖人不知有了多少皆未有如孔子者也况於夷尹而可若是班乎○未有孔子不可以仕止久速貫推開去說已包舉我



子貢有若之意在內矣

曰然則有同與一節

此條是設言三聖人太本大節之同處晦庵子以德之盛心之正作兩平看時文且依他說愚意作一串說更好孔子與夷尹雖未曾得天下然使得百里之地爲之君皆能朝諸侯而有天下所以能有天下者豈是行不義殺不辜而得之蓋是心之正德之盛諸侯自然來朝萬民自然來歸而有天下也若是行一不義殺一不辜而得天下則皆其所不爲者矣

曰敢問其所以異一節

孟子要引宰我子貢有若之言以見孔子之異於夷尹故先明三子之言爲可信智足以知聖人句重汙不至阿其所好

輕帶說汗字與智字及此二句是友復明三子之言必可信  
耳知三子之言必可信則知孔子之聖夷尹必不可得矣而班  
罕我曰以予觀於夫子賢於堯舜遠矣

此條是罕我知聖人之言孔子之道德只與堯舜一般功業  
却賢於堯舜致治於一時功業猶有限孔子垂教於萬世功  
業則無窮也○罕我說孔子之功業如此其說道德亦有云  
夫子言不離道動不遺仁貴義尚德清而好儉仕而不祿所  
以爲積木合則去退無吝心妻不服承妾不衣帛車器不雕  
馬不食粟道行則樂其治不行則樂其身此所以爲夫子也  
亦可謂知聖人之德矣○堯舜大聖人也而且賢之賢之  
而且遠矣况乎六六六

子貢曰見其禮一節

此條是子貢知聖人之言子貢之意不重百玉只重在孔子見禮知政聞樂知德是泛論箇理也要以德政爲主禮以飾政者故見禮可以知政樂以象德者故聞樂可以知德如見汙尊杯飲之禮使知上古朴畧之政見邊豆簋簠之禮使知後世尚文之政聞盡善盡美之樂使知性之者之德聞盡美未盡善之樂使知反之者之德此類是矣○等百世之王是差等百玉之德政未有夫子是未有如孔子之德政者不是未有孔子之禮樂也子貢嘗云夫子之牆數仞不得其門而入不見宗廟之美百官之富便是孔子之德又云立之斯立之斯行綏之斯來勸之斯和便是孔子之政百王之德政

管未有如孔子者矣况于夷尹乎

有若曰豈惟民哉一節

此條是有若知聖人之言豈惟民十句都是引起之詞歸重  
在孔子二句豈惟民康已舍箇類字意天下之物莫不有同  
類也豈惟民哉故繼之云麒麟之於走獸鳳凰之於飛鳥泰  
山之於丘垤河海之於行潦物物皆同類也聖人之於民獨  
非類乎其形同其性同是亦同類而已矣但聖人能盡其性  
而踐其形出乎其類焉耳拔乎其萃就是形容出類的意思  
不是兩平說話既高出乎其類則是拔起於衆人所聚之中  
矣此汎說聖人的盛康然自生民以來不知有了多少聖人  
皆未有盛過孔子者聖人出乎民之類而孔子尤出乎聖人

之類也聖人拔乎民之萃而孔子尤拔乎聖人之萃也聖人是同中之異孔子異中之異矣其甚盛而茂以加焉者哉○聖人者麒麟鳳凰也然麒麟鳳凰亦飛走於天之下者也聖人者泰山河海也然泰山河海亦流峙於天之下者也孔子其天乎故曰未有盛於孔子也聖人皆未有盛於孔子者矣而夷尹獨能盛之乎此孔子所以莫之能班也此孟子所以順學孔子也則其知言養氣而當大任亦不動來遠矣哉

孟子曰以力假仁者一節

此節言人之服王霸者亦有誠僞不同○自古王者皆得人  
心悅誠服此獨以七十子服孔子譬者孔子布衣耳初無勢  
力舉人尤見以德之意明白七十子亦無此勉強自然服他

且極流離困苦亦不忍去充見解心悅誠服之甚○無思不  
服思是心思無一人的心思不服即此以德服人中心悅而誠服之謂矣

孟子曰仁則榮一節

此為當時不仁之君說仁則榮是以榮歆動之不仁則辱是  
以辱警懼之若說仁人則正其誼不謀其利明其道不計其  
功豈以榮辱之故而後為仁也

如惡之莫如貴德一節

此說仁則榮之事貴德尊士者貴仁之德故尊有仁德之士  
也賢能便是士在位在職便是尊之賢未嘗無才而所長者  
德能未嘗無德而所長者才二者兼收正為政刑之用耳故  
國家閒暇及是時便與賢能脩明其政刑可因者固可革者

華可損益者損益夫然後政皆仁政刑皆仁刑天下皆歸于  
吾仁而雖大國必畏之小國不消說矣○國家閒暇可謂無  
事了然須存箇有事的心康節子以太平時爲飲酒酩酊開  
花離披時候晦庵子以爲這處去危亡只是一間要兢兢如  
捧盤水方可保得此明其政刑所以爲不可緩也及字有汲  
汲之意書曰吉人爲善惟日不足者正如此○明其政刑是  
尊士的本意若只要士來備我之驅使供我之好樂則雖勞  
心焦思而士亦不羣搜巖剔藪而士亦不出夢卜物色而士  
亦不具矣又何望於大國之畏哉

詩云迨天之未陰雨一節

此引詩與孔子之說爲證尊賢使能而明其政刑即能治其

國家者雖大國必畏之即誰敢侮之之謂也○易以姤次夫  
康節子云時哉時哉未有夫而不姤者防乎其防邦家其長  
子孫其昌是以聖人貴未然之防伊川子云聖人爲戒必於  
方盛之時方盛而慮衰則可以防其滿極而圖其永久若既  
衰而後戒亦無及矣自古天下治安未有久而不亂者由其  
盛時不知戒也徂安富則驕侈生樂舒肆則綱紀壞忘禍亂  
則樂尊適是以浸淫不知亂之至也未陰雨而撒桑去鳥且  
戒之防之義可以人而不如鳥乎○

今國家閒暇及是時般樂怠敖是自求禍也

此說不仁則辱之事先時不能豫收賢才及國家閒暇便般  
樂怠敖政荒而不問刑苛而不恤則衆叛親離雖小國亦不



畏之不消說大國矣○及字亦有汲汲之意書曰凶人爲不善亦惟日不足者正如此○鳥一也知禍者未陰雨而撒桑土不知禍者火已作而猶怡然孔子順云燕雀處堂母子相哺窻突上棟宇將焚燕雀顏不變不知禍之將及已也般樂怠敖而自求禍者何以異於焚死之燕雀耶

禍福無不自已求之者

禍即辱福即榮榮以己之仁是福自己求之者辱以己之不仁是禍自己求之者○自求猶云自取此語是令人自反意不仁者往往以禍福爲由於天由於人只恁怨尤不知反己無怪乎禍益烈而不可解也

詩云永言配命一節

此又引詩證福之自己求者引書證禍之自己求者仁則榮不仁則辱信乎其然矣○此下四章都是要君之爲仁也仁者天地之心生民之命爲天地立心爲生民立命纔成箇君師纔成箇世道矣孟子苦心苦口惓惓要太平之開也如此孟子曰尊賢使能五節

此五節汎言王者之政信能行此處纔是勉當時之君此節言待士之政五者皆是仁賢能是仁者尊賢使能是王者傳宣至仁之所必資也故以爲先○賢者曰尊能者曰使二字亦是不苟下的試看高帝於張良蕭何則尊之爲師而爲相韓信則使之爲將而不託以腹心此尊賢使能之效也殷浩則使之爲將而至於狼狽桓溫則尊之爲相而幾於篡奪司

馬氏之尊能使賢亦可為鑒矣

此節言待商之政市字微讀廛乃市宅苑字作活字看取其  
廛之稅也廛而不征亦有法在內法而不廛亦有不征在內  
農是本商是末為商而逐末者多若不賦其廛則民皆不務  
農而務商故賦其廛以驅之於農然惟廛之耳亦不征其貨  
為商而逐末者少若亦賦其廛則民不樂於為商而有無又  
無以相濟故但以法治之而不更賦其廛農商于是兩便  
此節言待旅之政旅是行路的人旅人即不征亦有盜劫之  
苦北之旅劫於陸南之旅劫於水為北防者每有三里之堡  
兩道之牆然守堡之兵不過近官之虞而荒郊之遠則皆空  
壁之存其何以禦盜也牆塹之口不過百步之間而路口之

開則尤馳馬之便亦何以禦盜也爲南防者亦有巡江之官  
捕盜之兵然官之巡者不過問出以了虛文而兵之捕者則  
皆畏死不前之丁其勇敢者又有圖錢買放之弊亦何以禦  
盜也旅人之貨即不征於朝廷亦多歸於盜手矣莫若令南  
之各省御史被盜之人許赴察院告理卽以盜之有無多寡  
定所在之賢否優劣則官無不巡江而兵亦無不捕盜者矣  
令北之府縣等官被盜之人許查所在堡分告理卽責所在  
兵捕之如不獲盜斬其堡長以警衆則兵無不守堡者矣至  
於牆塹之口令各隨設堡處開之則旣不妨居民之往來而  
亦便堡兵之守禦矣必如此而後劫盜可免旅人之行  
此節言待農之政耕者助而不稅是行井田之法也井田之

法極好但如今行之亦難蘇子瞻說井田難行康亦明且悉  
了况今去蘇之時又將千年世事久已定人情久已相安一  
旦欲復井田不惟事勢之難而人情亦多駭矣唯有均田一  
事可行均田者不是人人均受若干田也人人而受田此吾  
心所深願者其如不可遂何人人而受田則必裁奪富人之  
田富人之田可奪也其如貧人之不能守此田何雖設爲不  
許賣田之禁然諺云蚤聞聖旨晚問故紙禁之不得而貧人  
之田又復歸之於富人如何得人人受田也蓋均田者今之  
田畝起科輕重不同而糧差却不分輕重是之爲不均也莫  
若委廉能之吏丈天下之田兩番覆抽而不遺險遠嚴治各  
役而必田糧刑田形不合者斬方數不對者斬不分荒熟之

鄉不分上下之等密藏原冊以杜其更改覈實總畝以均其  
起科然後糧差之類一切均派輕者同輕重者同重而天下  
無不均之嘆矣又何須井田之復行哉

此節言待氓之改此與前待商之改總是一項事所以分兩  
項說者只因當時待商有此兩層竊慮與貨並征已不是了  
又舉罰游民者併取之益不是了故先說那征商不是處意  
還未盡又說那併取的不是都是信口說出曰商曰氓亦不  
必計也宅不毛者有里布是本受有五畝之宅却遊手遊食  
拋荒而不種桑麻故罰之使出一里二十五家之布無職事  
者出夫家之征是不工不商之人故罰之使出一夫百畝之  
稅一家力役之征市宅爲積貨之所原非可種桑麻之地以

商賈爲業又非無所事事之人不可以宅不毛無職事罰之也故王者之世逐末者多只賦其廬便了暴君汙吏忘其所自來謂市宅之民亦是宅不毛無職事者又使之出夫里之布則重併矣民焉得而不病耶

信能行此五者一節

信能二字要重看謂實實落落能行之不徒虛文之粉飾真若父母之待子弟也故隣國士農商旅等民仰之若父母率其子弟攻其父母就鄰國之君攻我說子弟衛父母者有之未有與父母敵者無敵於天下是天吏也天吏爲天之所命人孰得而違之乎故士皆立其朝商皆藏其市旅皆出其塗農皆畊其野氓皆受其廩而仰之若父母若至北真父母天下矣於王何有哉

孟子曰人皆有不忍人之心

此章大旨總在此句與先王一條所謂人皆有不忍以下。是明人皆有不忍人之心凡有四端於我以下。是要人皆法先王以不忍人之心而行不忍人之政。○不忍人之心是生生之心仁義禮智俱是生生之心也。舊說以不忍作仁而謂先王有不忍人一節。

此說人雖皆有不忍之心而不能全體之全體之者只有先王故舉先王以爲人立法。○有不忍人之心斯有不忍人之政斯字猶卽字先王之心無物欲之蔽纔有不忍人之心卽有不忍人之政不待擴充而後能者此二句重下二句承此帶過到治天下可運之掌上。○有不忍人之心純是生生之



心也斯有不忍人之政純是生生之政也心內包得有仁義禮智政內亦包得有仁義禮智但此處未說明耳

所以謂人皆有一節

此是人皆有不忍之心的證驗不忍人之心是生生之心也怵惕惻隱雖亦是心之不忍然不忍之心亦未盡於此乍字皆字都不可輕看乍然之頃見孺子不待計較論量自然有怵惕惻隱之心此正是天機正是本心若在從容暇豫之時稍步打點安排便非本心了皆有者無分於賢愚親疎皆如此可見不忍人之心是人皆有之者矣○孺子事最易提醒人此與論良知以孩提之愛敬論不忍以牽牛之殼棘同個思由是觀之無惻隱一節

由是觀之是以乍見孺子皆有不忍之心觀之也惻隱羞惡  
辭讓是非皆不忍之別名不是有四箇心不忍是心之生生  
處有生方纔惻隱羞惡辭讓是非隨感而見若心一死了豈  
更有不忍惻隱者不忍於陷溺而傷痛也羞惡者不忍於不  
善而耻憎也辭讓者不忍於私已而推去也是非者不忍於  
昏昧而辨別也總是箇不忍人之心四句都是反說以見其  
必有耳無此四者之心便不得謂之人此四者之心則必有  
惻隱之心仁之端一節

此亦是說四者之心人所必有也蓋四者是仁義禮智之端  
仁義禮智爲人之所必有與四者之心爲人所必有也信矣  
○問仁義禮智之名是如何陽明子曰性一而已運於天謂

之命賦於人謂之性主於身謂之心心之發過惻隱便謂之仁過是非便謂之智自此以往名至於無窮只一性而已猶人一而已對父謂之子對子謂之父自此以往至於無窮只一人而已人只要在性上用功看得一性字分明即萬理人之有是四端也一節

此結上起下之語四端固我所必有亦君所必有者既爲人所必有則亦人所必能者顧自謂其不能非自賊而何又謂其君不能非賊君而何夫賊者盜賊也人而爲盜賊其心乎不甘於賊君則當勉其君之擴充矣不甘於自賊則其擴充凡有四端於我者一節

此教人以擴充之學四端不獨先王有之凡爲人者皆有四

端於我也知皆擴而充之重知字上苟能充之重在能字既知得要擴充似去擴充之也知擴充是工夫之始能擴充是工夫之極充者滿也稍有一毫欠缺亦不是滿滿則仁義禮智無一之不盡而此心之體無一之不全矣○知充者良知也靈覺之妙也能充者致良知也妙應不窮也知充而若火燃泉達生生之心惡可已矣能充而足以保四海天下皆在其生生之中矣充之便與先王以不忍人之心行不忍人之政者一樣保四海便與先王治天下可運之掌上者一樣到此地位則於君爲全忠於己爲全人矣而何有白之賊害罪哉

孟子曰矢人豈不仁一節

此章先借助藝當擇術以明人之當擇長矢函巫匠俱重不

仁一邊矢不若函之仁匠亦不若巫之仁此無他術使之然也故人之於術不可不慎一有不慎便害了吾仁○術字該得廣不止矢函巫匠術不可不慎此意最重孟子一生受用萬古光明只從善擇術來

孔子曰里仁爲美一節

夫仁天之尊爵就人上指出天說不是將一天一人截然分作兩項仁者萬善之元萬善雖皆天之爵仁則統領之而爲爵之至尊不可以人爵形容晦庵子云得之最先天命之性谷下是一齊稟受者未必先得仁而萬善在其後得也○濂溪子云天地間自有至富至貴可愛可求者亦尊爵安宅之謂也舍仁而言爵便是術之卑舍仁而言宅便是術之卑

不仁不智一節

仁義禮智之人有了尊爵有了安宅何至爲人役苟不仁不智無禮無義則天爵失而安宅曠不免爲人役了弓人矢人替人作弓矢亦是爲人役一般與爲弓矢者由其擇術不慎而爲不仁耻爲人役者亦由其擇術不慎而爲不仁故遂承之曰如耻之莫如爲仁也

如耻之莫如爲仁

如耻之莫若反其可耻者而爲仁尊我之尊爵安我之安宅義禮智亦在其中而我可以役人矣何至爲人役而可耻仁者如射一節

爲仁便是仁者仁者處其露由已意射者反求諸已後纔繳

云爲仁之機在我而無難如此人亦何憚而不爲乎○此章  
旣云莫之禦而不仁又云反求諸己都是說爲仁由己之意  
仁固包得義禮智然人之所以不仁者只緣是非之心不明  
與羞惡之心不正可故先云是不智也要人以是非之智而  
擇爲仁之術繼云如耻之要人以羞惡之義而決爲仁之機  
也如此而又不爲仁真人後哉人後猶人也真禽獸哉

孟子曰子路告之以有過則喜

人受天地之中以生本是善的何過之有只爲氣稟之偏物  
欲之累便有過若不知改則其過愈深將陷溺而失其所以  
爲人豈不可愛可懼若有告以過者因得知而改之復了本  
然之善豈不可喜子路以此喜聞過也

禹聞善言則拜

禹之心純是本然之善故不待有過只一聞善言便拜受江海所以能爲百谷王者以其善下之也禹之下拜真百谷王  
大舜有大焉三節

大舜有大焉者子路以改過爲己之善喜人告而改之是猶知善之在己而未能忘己禹以善言爲人之善感人言而拜者是猶知善之在己而未能忘己異視非善與人同者也舜則視人猶己而不以善爲在人視己猶人而不以善爲在己絕無一毫形跡之指絕無一己爾我之分渾然一體而善與人同故舍己從人而樂取於人以爲善夫不以善爲在己則雖有子路之言而亦不必於己之善不以善爲在己則



雖有禹之聞而亦不必於人之拜故曰大舜有大焉○舍已  
二句是一連說的舜不以已爲聖舍之從人而樂取于人以  
爲善也晦庵子作兩平解似太分析且以舍已作舍已之未  
善不知聖人如舜更有何未善處或問上却云舍已是不知  
立已而虛心以聽人非謂已有不善而舍之則其說亦是矣  
不知何以又有未善之註耶

此說舜之取人爲善不特一時爲然其平生都是如此凡人  
樂善之心未嘗無及居尊位則此意漸微了何者物欲攻之  
者衆耳舜至爲帝時還與耕稼陶漁時一樣此其忘已忘人  
之心具有徹始徹終之妙矣○舜以聖人而爲帝明足以照  
剛足以決勢足以專猶取諸人以盡天下之善所以履帝位

而不疚也。若自任剛明決行不顧雖使得上亦終不免此又是說善與人同大順大化最妙處。取善而未與乎人者一己之善不足以爲大。與人而未盡乎人者一人之善亦不足以爲大也。舜却隨善而隨取而隨舉則是以一己之善爲千萬人之善也。千足成八亦于是成。所謂盡己之性而叅贊天地之化育者此矣。其善不亦大哉。

大舜有大焉。至君子莫大乎與人爲善。源合作一隊看不可分作三節。大舜句是一總語。自善與人同至與人爲善纔是其大處。君子莫大乎與人爲善大字正應大焉的大字。舜所以爲大者以其舍己從人取人以爲善而又與人爲善也。人既有以裕乎己。己又有以及乎人。君子之善莫大於此。故曰

大舜有大焉。晦庵子分作三節把舍已從人取人爲善作明其大而與人爲善又推開去看恐於舜之大處亦見得不甚明矣。○大都看書章章要先合着本文看便意思血脉易得貫通。次乃分節看逐句看亦不妨若先節分句解不免隔斷有窒塞。晦庵子云近年以來看書者不復讀書之本文但擇取書中可爲題目之句以意扭捏妄作主張明知不是書意只取便於行文如此何緣得書義貫通也。噫又何望其有裨於心身而成莫大之善也哉。

孟子曰伯夷非其君一節

此條歷叙伯夷之事總歸在是亦不屑就已是以此不屑就爲結句前面許多說話都要與此相貫穿不是散散說的大意

云伯夷非其君不事非其友不交故惡人者非其君非其友  
也不立其朝而事之不與之言而友之若立於惡人之朝與  
惡人言如以朝衣朝冠坐於塗炭也而肯爲之友與臣乎其  
惡惡之嚴如此推其惡惡之心雖與鄉人立其冠不正亦未  
爲惡也且望望然去之若將浼焉況惡人之浼又何如也肯  
立其朝而與之言乎是故諸侯雖有善其辭命而至者不受  
○不受也者蓋以辭命雖善而其人則惡惡其浼已而不屑  
事之次之也若是者其不以就爲屑者哉

柳下惠不羞污君一節

此條歷叙柳下惠之出總歸在是亦不屑去已是以不屑去  
爲結局前而後之說話都要與此相貫穿亦不是散散說的

大意云柳下惠不羞污君不卑小官進不隱賢必以其道君  
雖污官雖小遺佚而不怨阨窮而不憫故其言曰爾爲爾我  
爲我雖袒裻裸裎於我側爾焉能免我乎故油油然與之偕  
而不自失焉袒裻裸裎且不能免而可與之偕也況汙君小  
官亦何免於我乎故諸侯有援而止之者雖則卑污亦不羞  
之而肯止也援而止之而止者其不以去爲屑者哉○君無  
明暗匡救便爲賢官無崇卑盡職便爲貴故汙君亦不羞小  
官亦不卑進不隱賢就於必以其道見之已本是賢者若進  
時依阿取容而不以其道便隱了已之賢必以其道則已之  
賢不隱矣○袒裻裸裎一段與上鄉人一段彼形此之謂  
孟子曰伯夷隘柳下惠不恭隘與不恭君子不由也

伯夷一於清必有不能和處故迫切而隘柳下惠一於和必  
有不能清處故褻慢而不恭○問隘與不恭是流弊如此否  
晦庵子曰這是諸先生恐傷了二子所以說流弊今以聖人  
之道觀二子二子多有欠缺處纔有欠缺便有弊所以孟子  
直說伯夷隘柳下惠不恭不曾說末流如此○君子不由此  
君子乃時中的君子若孔子是也不由是不由夷之清不由  
惠之和蓋君子本寧不清也而所由者時中之清不由清而  
隘之清君子本寧不和也而所由者時中之和不由和而不  
恭之和不是由夷惠之清和而不由其隘與不恭也隘與不  
恭豈在夷惠清和之外乎○學者做工夫須從大中至正處  
下手纔好若入門不正而又未造其極害道亦甚大也學夷

者未得其清而先得其隘矣學惠者未得其和而先得其不  
恭矣夷惠安在耶故凡有悖於中庸者皆謂之異端也中庸  
孟子曰天時不如地利地利不如人和

此章論用兵是王者之兵法王道以得人心爲本天時地利  
歷歷推下只重在人和天時不如地利地利又不如人和可  
見天時地利總不如人和也○用兵也要天時也要地利也  
要人和但人和尤要緊孟子爲當時用兵者只知有天時地  
利而不知有人和故發此論以示人要人知所重不在彼而  
在此○天心何處見下於人心而已地險何處見固於人心  
而已一得人心則天時地利皆在其中矣○時不時屬天利  
不利屬地人心和不和屬我在天地者不可必在我自恃不可

三里之城一節

此條明天時不如地利○三里七里是地利之至小者天時且不能勝則其大者可知矣

城非不高也一節

此條明地利不如人和○委而去之是人心不和委此城池兵甲米粟而去也雖有地利無人與之守矣亦何益之有故曰域民不以封疆二節

此條極言人和之當得下是推人和之本在於得道蓋章首說要人和蒙已含有得道意人豈無道而能和者觀故曰二字可知矣故曰是承接之詞不是推原之詞也○域民三句一氣說下域民國國威天下者不在封疆山谿兵革而在得



道者多助得道失道不兩平重在得道違得道之道亦只是  
仁而已以不忍人之心行不忍人之政民之所好好之民之  
所惡惡之是之爲仁是之爲得道人心未有不悅而助之者  
天下順之卽是多助之至順是願效順之意未便都來歸也  
順之者至於天下親戚不消說矣叛之者至於親戚又何  
天下順之是人和也君子以天下之所順攻親戚之所叛有  
不戰戰必勝矣戰而必勝則民不必封疆而自域國不必山  
谿而自固天下不必兵革而自威地利皆無所事而天時亦  
不必拘矣人和之功如此故曰天時地利皆無所事而天時亦

孟子將朝王一節

孟子此時在齊居賓師之位不與爲臣者同君於賓師若有

所謀便當往見不可召之或賓師有時自來見則禮尚往來亦無害也朝將視朝齊王謂來旦將朝見群臣不識可使寡人得見乎是要孟子來見他公明以臣禮待之而爲召矣  
明日出弔於東郭一節

明日出弔是因未幾之時以明其非疾也出弔於東郭又是因齊之臣以致警於王也夫何東郭無轉移之道王亦無警省之機問疾醫來固王之不悟亦東郭之不悟也○公孫丑不與之言景丑却與之辯者要因景丑以禮王丑為門人外禮王丑為門人之當自悟耳  
王使人問疾一節

齊王以孟子爲真疾使人來問又使醫來治此意也好孟仲子合當以替疾人愈而出弔爲對使者後命時王必曰可出

平獨不可來朝乎將自悟其召見之非矣方對之以推詞而孟子之意終不得達之於王故不得已而之景丑氏宿焉不得已而之景丑氏宿一節

不得已者欲造朝則不可以應王之召欲歸家則又無以啓王之憎故之景丑氏宿焉景丑亦齊之臣亦出平東郭之意○君之尊如天臣子更無可尊者尊之道只是這點敬心敬君者成其君之尊可也惟仁義纔可成其尊仁義莫過於堯舜孟子以堯舜仁義之道陳於王蓋望其爲仁義之君望其爲堯舜之君而成其如天之尊者也此之謂責難之恭此之謂陳善之敬豈特齊人莫如其敬而已耶○天資只是箇實實的孟子便把堯舜望他聖賢輔相之道自是如此相業

須從第一等事做起若以君爲不足與言仁義是要幹何等事也晦庵子曰君子上不敢愚其君以爲不足與言仁義下不敢鄙其民以爲不足以興教化中不敢薄其士大夫以爲不足共成事功一日立乎其位則一日業乎其官一日不得乎其官則不敢一日立乎其位其此之謂哉

景子曰否非此之謂一節

景子以君臣之禮律孟子不知孟子之於齊無君臣之分也君命召不俟駕之禮豈可曰不相似然

曰豈謂是與一節

晉楚之富此富字兼有爵在內富者於利無所不備仁統四端包萬善而於理無所不備故以仁對富爵者操予奪之權

義有裁制決取舍而操宰物之權故以義對爵○天下有達尊五句是解曾子之意爵齒德爲天下之達尊德卽仁義也晉楚有爵之達尊而曾子亦有德之達尊以此不慊於彼乃今我既有德而又有齒是有達尊之二王但有一達尊之爵惡得以一而慢二也解曾子之意只合云爵與德而兼云齒者又是爲自家張本耳○朝廷莫如爵要以君爲主莫如君之爵尊也卿黨莫如齒孟子於王雖不是卿黨然亦無朝廷之拘則齒亦在所當尊輔世是維持世道長民是表率斯民此事唯仁義做得智力終不濟事也惡得以一而慢二把一二較多寡爲屈伸不免有此英氣然對不知者說則亦不得不如此矣○晦庵子曰爵齒德三者不相值便各伸其尊而

無所屈一或相值便通視其所在而致降故朝廷之上以伊  
周之忠聖元老而祇奉嗣王左右孺子不敢以齒德加焉至  
論輔世長民之任則太甲成王又拜手稽首于伊周之前矣  
其迭爲屈伸以致崇極之義如此故曰通視其重之所在而  
致隆焉惟可與權者知名此說亦好

故將大有爲之君一節

齊主以一而慢二是不足與有爲也故將大有爲之君則不  
敢以爵位尊必尊賢者之齒尊賢者之德而有所不召之臣  
不召之臣就君說此臣字不是當仕有官職者如云市井之  
臣草莽之臣一總故不可召欲有謀焉則就之正是不召之  
也召之者則臣亦不與之謀矣其何足以大有爲乎

故湯之於伊尹一節

湯於伊尹桓公於管仲學焉而後臣之是有所不召之臣也  
不勞而王不勞而霸則是大有爲矣○尊王黜霸是聖賢的  
家法此以王霸並稱者取節之意耳○學焉而後臣謂臣之  
之時以學爲先也重在學上學是以之爲師臣亦不是卑之  
之詞不勞而上霸者君旣盡其禮臣自盡其材臣旣效其勞  
君自享其逸矣王霸之業不易易而成乎

今天下地醜一節

今天下地醜德齊無一箇能關地無一箇德稍優而大有爲  
者由其好臣爲已所教之人不好臣爲已所受教之人是與  
湯武之學焉後臣者異矣故不足與有焉而莫能相尚也矧

湯之於伊尹一節

管仲且猶不可召除却伊尹者伊尹王者之佐其不可召固也管仲特霸者之佐宜若可召矣而且猶不可召况我之不爲管仲者乎○孟子非堯舜之道不陳便是樂堯的伊尹有輔世長民之德便是富仁義的魯古如何可召得齊王若一意師承而有謀輒就則行王道而王其爲湯武者此卷行帝道而帝其爲堯舜者此矣奈何寒疾之託遂爲心疾之真也而竟不可救藥耶○問孟子此時不可召後又爲卿於齊是何意思曰孟子願學孔子者不可召而不應可以止則止也可爲卿而爲之可以仕則仕也然雖爲卿而亦不受其祿則其進退亦綽綽有餘裕矣妙哉



陳臻問曰前日於齊一章

前日今日四句重伍非字上夫子必居一於此言未免有一處不是皆是也不必云皆是義而所以皆是者則以其皆適於義耳○宋之辭曰餽贐薛之辭曰聞戒兩辭字重看餽之者有辭受之者亦有辭矣○齊未處在遠行亦未處在戒心既無所處則餽之者無辭受之者亦無辭矣○凡事都要有箇不得已的心不得已終受一貨不得已終置一物不得已絲用一付不得已終爲一事便不到得錯處便也皆是矣○充義之學湏是至義之盡一毫不可苟且稍稍苟且一時後來便漸染不覺既苟於辭受則必苟於出處既苟於出處則一切辭受全糊塗而莫之省平生所學安在耶卽此便喪氣

毀節臨利害時狐鼠之態一齊出矣卑哉

孟子之平陸謂其大夫一節

此與士師不能治士章同箇機軸先提醒距心使之無所遁  
了然後其言可得而入○古者公卿大夫兼治兵民故云子  
之持戟之士不待三者一次失伍便殺之也

然則子之失伍也亦多矣一節

子之失伍是借失伍字說失職士之三失伍者其失伍也固  
多子之民凶年飢死而不救其失伍也亦多矣彼之失伍者  
固當去此之失伍者則當何以處之乎○此非距心之所得  
爲意以倉廩府庫皆爲之玉不得專而發之耳○士大夫只  
要盡心得爲不得爲說不得此非距心之所得爲可謂不盡

心矣試看明道子說爲令之職必使境內之民饑年免於死  
亡飽食逸居有禮義之訓然後爲盡吾於扶溝經畫溝洫設  
學校以教邑人子弟皆幾成而廢夫百里之施至狹也而道  
之興廢繫焉豈不是有命然知而不爲而責命之興廢則非  
矣此吾所以不敢不盡心也彼距心者何足以知此耶一  
曰今有受人之牛羊一節

士大夫受君之民而爲之養之猶人受人之牛羊而爲之牧  
之者牛羊晝要飼之牧地夜要飼之刈芻爲人牧牛羊者必  
就其人求牧與芻以飼之爲君養民者雖倉廩府庫不得專  
主而於饑年亦必就其君求發倉廩府庫以賑之求牧與芻  
而其人不可不立視牛羊之死求

倉廩府庫而其君不與則當以民反其君而亦不可立視民  
之死也此不重在責距心之不去重在責他不求於王以服  
民所謂有司莫以告是上慢而殘下者矣○此則距心之罪  
亦是不求於王之罪不是不去之罪也求之而不得者固當  
去然亦有箇權宜之法易之益曰益用凶事無咎重宜應卒  
若汲黯賑河內之饑者亦無咎也可一槩曰去之是耶○我  
高皇帝嘗曰民饑而候奏請道途往返遠者動經數月饑死者  
多矣自今天下有司饑年先發粟以貸民然後奏聞則是芻  
牧尤不待人求而人人皆可汲黯矣牛羊亦何至於立斃  
他日見於王曰一節

爲王誦之誦已與距心兩下之言所以諷王也此則寡人之

罪主亦只因距心之知罪不得已以罪自認耳雖是不得已然亦天理之乍明也柰之何人欲錮蔽而終不能改則亦終爲罪人而已矣罪人而可爲君乎哉

孟子謂蚺鼃曰一節

士師是理刑之官刑罰最繫民命稍有不中便傷君之仁且士師得近君有不中處便可以言蚺鼃之請士師所以似有理也然今數月而猶未言將以爲有待則數月之間豈無一可言者將以爲不敢言則士師之請亦何益也得言而不言與不得言而不去皆無一可者也此是激勵蚺鼃之意

蚺鼃諫於王而不用致爲臣而去

蚺鼃不是汎諫是爲刑罰之不中諫王○致爲臣而去

亦知去就之義者。自士大夫以官爲家。去就之義。擯而不講。乃有老死於位。雖蒙詔置。亦晏然不顧者。甚有病卧牀褥。猶日探除拜問調遷者。是皆抵龜之罪人矣。○宦途譬之於海。百險備焉。逆之則危。犯之則溺。不知而不去。謂之逆。知可去而不去。謂之犯。抵龜此去。若沂恬波而行。興意窮極舍舟而登陸矣。崇安齊人曰。所以爲抵龜。則善三節。

官守言責四句。不重。只以起下四句。抵龜意也。要點出龜是存言責者。不得其言。固去之矣。若我則既無官守。又無言責。既無職之不得。又無言之不得。可以進。亦可以不進。可以退。亦可以不退。進退之權。在我。而不在人也。豈不綽綽然有餘裕哉。○賓師與君不合。亦終是去的。但緩得些子。不比那

官守言責的人焦急促不得便著去也齊人知此哉

孟子為卿於齊一章

齊王勞孟子出弔特欲借以為重凡百弔禮畢卻不收相煩  
弔禮事雖有有司諸人治之亦不嫌問孟子云夫既或治之  
予何言哉託辭也○孟子待王驪與孔子待陽貨是一箇家  
法君子待小人只如此最妙小人無如之何者明道子待王  
介甫亦是此法每論事心平氣和介甫多為之動而好直者  
必欲力攻取勝由是介甫執之益堅而與君子為敵竄逐無  
虛日了明道葺云新法之行亦是吾黨爭之太過遂成今日  
之事塗炭天下亦湏兩分其罪若俟其勢久自緩委曲平章  
尚有聽從之理為害亦不至如此甚也真得待小人家法矣

○陽明子曰聖賢待人亦有時而委曲其道米甞不直也若已爲君子而使人爲小人亦非仁人忠恕惻怛之心孔孟於群小渾然不露圭角者正是不使他爲小人耳此所以爲仁孟子自齊葬於魯一節

充虞敦匠事是董匠人治棺槨木若以美然指棺槨各七寸說晦庵子訓以美作太美時文且依他說愚意以者爲也不與已通木若以美然者祇爲觀美而然也故孟子云非直爲觀美也正破此以美之疑

曰古者棺槨無度一節

古尺短不似今尺長槨七寸槨稱之是古尺之寸○非直爲觀美至人心獨無校乎節節相承說棺槨之堅厚非爲觀美



也然後盡於人心耳雖必如是然後盡於人心然或無財又或法制不當得亦不得以自盡其心也須是得之爲有財然後得用之而盡其心得用之而盡其心者蓋以棺槨既堅厚庶不使土親死者之膚然後人子之心盡而無所恨矣於人心獨無忤乎正應然後盡於人心之意

不得不可以爲悅一節

此處重在得之爲有財得之是法制所得爲有財是財力存可爲古之人就周公制禮以後說吾何爲獨不然者吾今亦得之爲有財也何獨不如古人而用七寸之棺槨耶

且此化者無使土親膚於人心獨無忤乎

生變而爲死故云化土不親死者之膚則親之骸骨可歷矣

遠而人子無窮之痛亦可以慰萬分之一也○始而曰盡於人心終而曰於人心獨無忤乎孟子於此只要自盡其心而已矣豈有一毫爲人觀美之意

吾聞之也君子不以天下儉其親

君子不以天下儉其親設有美物是天下所難得者若爲天下所難得者愛惜之而不以奉親是以天下儉其親也君子思爲之乎此亦不專指棺槨說嗟嗟天下最難得者親也難得而亦易得者物也親死不可以再生物盡猶可以再得猶可再得之物而思不可再生之親風木之悲宜不勝其痛矣君子之不以天下儉其親也有以哉

沈同以其私問一節

沈同問燕可伐不魯問以齊伐燕且是私問不魯以王命來  
若以王命來問則孟子必有以告之不只數燕之罪而已○  
子曾不得與人燕子之不得受燕於子曾不得二字重看是  
以理法斷其不得也國家受之天子傳之先君有天子存不  
得而私之私便不忠于天子有先君在不得而私之私便不  
孝于先君不孝不忠罪莫大焉故爲可伐○燕是篡竊齊而  
爲之者夫挈萬鈞之鼎者烏獲以爲常而他人以爲勇游干  
仞之淵者泮人以爲常而他人以爲神子曾子之而效堯舜  
是懦夫而挈烏獲之鼎稚子而遊泮人之淵也鮮不敗事矣  
○有仕以下借以爵祿私授受者說則可乎是以爵祿私授  
受者不可也然則以國家私授受者何以異於是私爵祿者

罪可誅矣私國家者不可伐也

齊人伐燕或問曰勸齊一節

天吏是奉天命者天無言何以謂之命民心向背是也子喻  
子之私相授受民心決不安便知非天命所在○天以靈明  
生人人得天之靈明以有生故民心靈覺處即是天心吾人  
凡有舉動苟民心不與即是違天然民心與吾心本同吾心  
安即民心亦安故觀天心者卜之民心而已觀民心者察之  
吾心而已○春秋之義以賢治不肖不以亂治亂孔子曰懷  
惡而討雖罪不服齊以燕伐燕正懷惡而討者也燕人服  
此章合上章始而說燕可伐者豈爲齊謀乎禪繼之與天命  
之公也不得以私燕也終而說齊不可伐燕者豈爲燕謀乎

征伐之權天討之公也不得以私齊也聖賢大公至正之心與天合一之道亦見于此

燕人畔王曰吾甚慙二節

齊王慙於孟子是慙不用孟子之言○陳賈云周公不仁不知重在不智邀齊王不知燕人之畔而取之周公不知管叔之畔而使之賈欲以此解王之慙故云請見而解之也

見孟子問曰周公何人一節

周公不知管叔之叛而使之委的有過但其過是宜有者故孟子不以爲無過只云周公之過不亦宜乎詩云公孫碩膚德音不瑕亦宜乎之謂也○周公之過直以天理人倫爲重不論區區智識上兄弟至親不逆探其惡而使之纔得其道

若逆擇而不使雖可免不智之過然無兄之罪却大了哉周公之過宜有不宜無周公而無過使所得者小而所失者大論者將責其大而不錄其小是其無過者所以爲過也周公而有過使所失者小而所得者大論者將取其大而不計其小是其有過亦可以無大過矣○問周公於管叔固是不逆詐不億不信者然卒爲管叔之詐與不信所欺似乎誠而不明也曰此非所以論周公者周公以天理人倫爲重是明在天理明在人倫聖人在天理人倫之外何忍著一此意見自不害其爲明也管叔之叛真意外之變理外之事當初使他時他未必有此意故一向信任他若有一毫萌孽周公决不使之矣○愚謂周公之過固宜也不若併其過而無之夫何

以能無過也蓋兄弟之間不幸而有罪誅之則無以全恩不誅則無以全義若封建時倣舜之虞象不論跖戚皆使吏治其國而納其貢稅受封者皆不得有爲於其國即有欲叛者亦不得爲叛矣是非逆探其惡也爲天下建久安之策而亦欲保全此受封之人耳如此則公亦何至于有過哉

且古之君子過則改之一節

孟子見陳賈特地撰出此議論到面前講必有箇以古飾今以君子文小人之意故又綴之以此其實不知爲齊王解懸說也○古之君子今之君子俱是汎說的如日月之食四句是於過則改之上又說箇不自諱豈徒順之二句是於過則順之下又說箇爲之辭末要繳云古之君子其過如此此所

以卒於無過也。今之君子其過如此。此所以卒陷於有過也。故自愛者必以古之君子而自處。愛人者亦豈預以今之君孟子致為臣而歸二節

齊王足用為善。孟子亦不忍去齊。但經時既久而道終不行。故致為臣而歸。○不敢請耳。蓋以義言之。不敢復來請見。然以臣之心言之。固所願見也。要之願見亦不是。徒見願其

他日王謂時子曰一節

孟子欲去時。齊王不魯留。一時去未成。他日見其未去而留之。此意已是不謬。養弟子以萬鍾。即是養孟子。又是誘之以利。夫君於賢者。惟明線能知其有益而不牽於一己之私。惟誠終能推心置腹而不奪於諛和之口。區區利祿於賢者何



加也而足以留其行乎

時子因陳子而以告孟子陳子以時子之言告孟子

齊王不敢自達而托之於時子時子又不敢徑達而托之於  
門人亦可謂知所尊者惜乎以利祿誘之而非真能尊賢者

孟子曰然夫時子一節

孟子曰然者然齊王有是言也彼萬鍾之養王豈以予欲富  
乎如使予欲富則前日爲卿辭十萬之祿今日乃又受萬  
鍾之養辭多而受寡欲富者必不爲是也予既不欲富王亦

季孫曰異哉子叔疑一節

此引季孫之說見得辭十萬而受萬者決不可也不得仕焉  
而又得萬鍾與自己不得而子弟又得者雖不甚同要皆是

古之爲市者一節

不得於此而求得於彼耳○問子叔疑是不得於此而求得於彼龍斷是欲得於此而又得於彼者何以爲同曰不得於此而求得於彼者原其本心亦是欲得此又得彼也與龍斷何異耶

此解龍斷之說重箇賤字曰有賤丈夫曰人皆以爲賤曰自此賤丈夫始不特一人以爲賤而人皆以爲賤不特駕禍於當時而又遺禍於後世其賤如此可惡之甚也欲富貴者與此一樣則是以士大夫之貴而下同商賈之賤既不能流芳於一世又不免遺臭於萬年亦可惡之甚矣○必求龍斷而登之是登高以望遠或此處無某貨則其貨便得利或彼處無某貨則其貨便得利于是以某貨至彼處易之又以某貨

至此處易之使得利甚多是將市利一網打盡了故從而征之然人人之爲商者豈盡如此乎後世則緣此遂征商矣○末要繳云齊王以萬鍾而留予是亦市利之所在也○若辭十萬而受萬是亦龍斷之罔市利也○則人亦以予爲賤丈夫亦以予爲異哉之子叔疑矣而予肯爲是哉○市井之人窮日之力竭智巧以爭錐刀之利人人自以爲得也吾于泰山喬岳之上而下視之不啻蟻蚋之爭糞壤耳是非彼之暗而吾之明也彼居其中而吾則立其表也然則破富貴之誘者必立乎富貴之表者也孰爲富貴之表義理是也大丈夫立于義理之喬岳下視蟻蚋之市井而明見富貴之糞壤則天下之富貴有不破者哉

孟子去齊宿於晝一章

客爲留行是不出齊王之命而私以己意留孟子者昔者四  
句重繆公上繆公於子思泄柳申詳待之雖不同然一則因  
人而達其誠一則因人而盡其誠要皆繆公有以留之也○  
泄柳申詳亦不是倚君側之人求安者但繆公之側自有其  
人此段是帶引的其實孟子不屑以二子自處亦不止望王  
待以二子之禮者故後只云子爲長者慮而不及子思○子  
爲長者慮而不及子思是以我爲不及子思了非絕長者而  
何子絕長者乎長者絕子乎雖是兩詰之之辭其意却是說  
子先絕長者而後長者絕子也○大丈夫不爲九霄之鵬則  
當豹隱南山之霧即時子之留出於王命者亦且羞爲賤丈

夫而不留矣况先絕長者之客而肯爲之留哉

孟子去齊尹士語人一節

尹士之譏有三段一曰不明二曰子澤三曰濡遲孟子只辨  
濡遲一段而於不明于澤不辨者千里而見王是予所欲也  
既然欲行道則不逆料王之不足爲湯武而且

不是子澤也亦明矣

高子以告五節

予千里而見王不是欲于澤亦不忍逆料王之不足爲湯武  
意者王可爲湯武而因之行道濟時焉此予之所欲者不遇  
故去豈予所欲哉不得已也

予三宿而出晝尹士固以爲遲在予猶以爲速何者予猶望  
王之改其失也王若能改之則必來晝而反予矣

予宿畫而望王若此又出畫而王不予追予然後知王之不  
果反予而浩然有歸志矣予雖然豈忍舍王哉蓋王猶足用  
爲善若能用于亦可爲湯武者豈徒齊民安天下之民舉安  
惜乎不用予也且王所以不用予者特以其失之不改耳王  
庶幾改之予日望之身雖浩然而歸矣心恐憊然而忘哉○  
問當時王命時子傳言孟子却不肯留及出畫後又望其追  
不知何以追統可留得曰湏看王庶幾改之除是王痛自刻  
意真有爲國爲民的意思要行孟子之道終求追統可留得  
中國之害萬鍾之養都是虛名且是利誘也肯爲此而留番  
○王庶幾改之王如改諸則必反予是出畫時望也主庶幾  
改之予日望之是歸去後望也此處全要認得箇頭腦若頭

腦不在行道濟時上便似有他望一般

予豈若是小丈夫句一氣直管到來大丈夫處其厚不居其薄孟子大丈夫也豈若是小丈夫然哉

尹士聞之曰士誠小人也

孟子欲去之始而不忍去方去之際而不忍舍既去之後而猶不忍忘此君子之所爲也惟君子然後知君子士誠小丈夫也只知諫君不受使悻悻而去窮日子之力後宿現豈知君子之所爲若此哉

孟子去齊充虞踏問二節

舊說彼一時此一時者孟子云我前日之言乃安常處順而未有所感固一時也可以不怨尤也今日去齊之時則吾道將廢而不得有爲又一時也不能不怨尤也愚意聖賢心事

始終是不怨不尤者若依此說則前日所言者不必其行之  
顧今日所行者不必其言之顧能言而不能行怨天尤人全  
不成箇聖賢了蓋彼一時也雖不怨不尤而憂世之志未嘗  
忘也此一時也世不我用則道終不行雖亦不怨不尤而憂  
世之志却無以自解也如之何不憂哉此則始終不怨天不  
尤人而言行亦相顧矣

五百年必有王者興二節

此一時之不豫者蓋以五百年必有王者興其間必有名世  
者輔之是君臣際會自古皆有一定之期也今也由周而來  
七百有餘歲以五百之數論之則過矣久當有王者興而不  
興以亂極思治之時考之則可矣而天下又不見其治我雖



有各世之才而不得成濟世之業是自古皆處其常而我獨處其變矣焉能無不豫哉

夫天未欲平治天下也一節

此又言今日未嘗不豫也夫天未欲平治不重只以起如欲平治三句天意未可知而其具又在我則亦未嘗不豫矣○問天若終不平治而舍孟子則亦有不豫乎曰孟子亦只如此說以解充虞之疑耳若終舍之而不用此心亦決不怨尤不戚也○也憂世之志樂天之誠自有並行不悖者而何不豫之有哉○孟母亦嘗問子之不豫矣孟子曰道不行而母老是以憂也母曰禮婦人無境外之志今子成人也而我老矣子行乎子義吾行乎吾禮子何憂乎賢哉母也何爲乎不豫哉

孟子去齊居休二節

仕不受祿雖不是古之道然孟子所以不受者蓋因始見齊王退而有去志若受了祿便為所羈而難去雖不欲去其去志故不受也繼而有師命不可以請久於齊非我志也

既不受祿宜乎去矣乃久於齊而不去者蓋以國有師命時方戒嚴而不可請去故久於齊要之非我志也○師命亦是託詞要云亦豈無機會但齊王足用為善萬望之意儘多以此不決於去○問前云予三宿而去畫猶以為速且云王庶幾改之予日望之今却云見王即有去志又云久於齊非我志者何也曰聖賢不潔身以亂倫亦不徇利而忘義不汲汲於留也亦不悻悻而去也此所以為仁之至義之盡者歟

上孟九卷終